

UngData Elevundersøking



Dei fleste trivst på Tryggheim. – Lærarane er så interesserte i oss elevar, fortel elevrådsleiar Silje Anett Vestvik. Til hausten dreg ho til Nairobi for å arbeida på barneheim. Etterpå blir det kanskje sjukepleie eller lærarutdanning. FOTO: CARINA JOHANSEN

Triveleg på Tryggheim

➤ Elevane ved Tryggheim vidaregåande skule er eksemplariske. **Mest ingen røyker, brukar alkohol eller andre rusmiddel.** Og 93 prosent er nøgd med vennene.

NÆRBØ

Det viser ungdomsundersøkinga som nyleg er gjort i Hå. Så eksemplariske elevar som på Tryggheim vidaregåande skule, har Eyvind Ohm ikkje sett før. Han arbeider ved Rogaland A-senter og var i kommunestyret denne veka for å leggja fram resultatane av ungdomsundersøkinga Ung Data 2013. Den kartlegg oppvekstssituasjonen, livskvalitet, handlingar og haldningar. I Hå har den vore gjennomført i ungdomsskulane og ved Tryggheim vidaregåande skule.

Mønsterelevar

Og Tryggheim kan altså likna ein engleskule:

– Eg har aldri sett så positive tal for ein vidaregåande skule før. Det er veldig få som røyker, få som snuser og ingen som drikk. Dei veit koss dei kan skaffa seg hasj, men dei bruker det ikkje. Og 93 prosent er fornøgd med vennene sine, sa Ohm.

– Eg skulle ønskt at me hadde tal for elevar som bur i Hå og går på vidaregåande andre stader. Eg er usikker på om resultatet på Tryggheim gir representativt bilde av Hå-elevar i vidaregåande, men det er flotte tal.

Elevrådsleiar Silje Anett Vestvik fekk onsdag beskjeden om at ho kjem opp i norsk. Det betyr at eksamensdagar. Sjølv har ho hatt ei svært god tid på Tryggheim. Ho trur at særst interesserte lærarar er ein viktig grunn til det.

– Dei er så interesserte i oss og gjer så mykje for oss, fortel ho. – Og dei signaliserer verkeleg at dei er interesserte i oss som personar, ikkje bare faget.

Sjølv er ho frå Klepp, og har budd heime. Men ho trur at internatlivet på Tryggheim er viktig for fellesskapet.

– Må ein vera kristen for å trivast her?

– Nei, det trur eg ikkje. Somme søker seg hit fordi det er ein kristen skule. Men mange kjem fordi dei høyrer at det er godt å vera her. Eg oppfattar at folk trivst og får seg venner for livet enten dei er kristne eller ikkje.

Studieleiar Oddmund Gravdal set pris på elevrådsleiaren sine erfaringar med interesserte lærarar.

– Personleg trur eg det er vårt fremste konkurransefortrinn, seier han. Han opplever at elevar som prøver ein annan skule kjem tilbake fordi dei opplever at tryggheimsleiarane ser dei. At nær 92

prosent av elevane fullfører og består skuleåret, viser også at trivselen er stor.

– Det kan nok vera at ekstra mange av våre elevar kjem frå stabile heimar og kristne miljø. Men også me har ei samansett elevgruppe. Det me likar minst er at det er fleire enn før som slit med einsemd og depressive tankar, seier han.

Satsar på miljøet

For å takla dette har skulen sett inn ekstra ressursar, blant anna meir bemanning i internatet og i arbeidet mot mobbing.

Også kommunalsjef for opplæring, Ragnvald Riis gler seg over dei gode resultatane ved Tryggheim

– Det må bety at dei gjer eit godt arbeid.

– Men er det bra å samla så mange mønster-elevar på ein stad?

– Så lenge det ikkje går ut over miljøet på andre skular, ser eg ikkje noko problem i det.

– Kvifor trur du det er slik?

– Det kan vera ein kombinasjon av at elevane kjem frå stabile miljø og av godt miljøarbeid på skulen.

Som andre

Ungdomsskulelevane i Hå er ganske like ungdom elles. Det vil seia

dei fleste drikk og rusar seg mindre enn før, trivst stort sett med venner og foreldre og har det bra. Det som aukar over alt er depressive tankar og einsemd, særleg hos jentene. Slik er det også i Hå.

Men færre Hå-ungdom trur dei vil bli arbeidslause enn ungdom i resten av landet, dei brukar i gjennomsnitt mindre tid på lekser enn elles og færre satsar på høgare utdanning.

– Me har ein jobb å gjera med elevane sine haldningar til skulearbeidet, seier kommunalsjef Ragnvald Riis.

– Det er positive tal som elles i landet. Korleis aukande einsemd og depressive tankar hos jenter skal tolkast, veit me ikkje. Det vonar me å få vita meir om etter kvart.

– Det er ein svakheit at undersøkinga seier lite om ungdom etter ungdomsskulealder, berre om dei 20 prosentane som går på Tryggheim.

– Eg veit at somme er bekymra for meir rus hos den eldre ungdommen. Det vonar eg også å få vita meir om etter kvart, seier han.

Ungdomsundersøkinga Hå

➤ **Kva:** Ei standardisert ungdomsundersøking som vert brukt over heile landet, også i Rogaland der 21 kommunar er med.

➤ **Desse var med i Hå:** 666 ungdomsskuleelevar (84 prosent).

➤ 214 i VG1 og VG2 på Tryggheim vidaregåande (59 prosent, mange var i praksis).

➤ **Gode resultat:** Dei fleste ungdommane i Hå er fornøgdde og trivst, drikk mindre enn før og har det godt. 90 prosent er fornøgdde med vennene. På Tryggheim er 93 prosent fornøgdde med vennene.

➤ **Framtidstru:** Men færre enn elles trur dei vil ta høgare utdanning og bare 8 prosent trur vil bli arbeidsledige. Elevane bruker mindre tid på lekser enn gjennomsnittet.

Tryggheim vidaregåande skule

➤ **Eigar:** Norsk Luthersk Misjonssamband eig og driv skulen i Nærbø sentrum.

➤ **Elevtal:** Rundt 500, 190 bur i internat.

➤ **Søklarar:** 160 søkte 60 plassar studiespesialisering. Det trengst mellom fire og fem i snitt for å koma inn på studiespesialisering.

➤ Også bra søking til elektro- og byggfag i år. Dette svingar med konkurranse. Noko mindre søklarar til helse og oppvekst.

➤ **Gjennomføringsprosent:** nær 92 prosent.

➤ **Ungdomsskule:** Eigen ungdomsskule med 180 elevar.

REIDUN GUDMESTAD

reidun.gudmestad@aftenbladet.no